

Trayecto HALT tin enfoke pa yuda hobennan cu comete delito leve keda afo di e sistema hudicial y no bolbe cay cera



Ayera tardi durante un conferencia di prensa Stichting Reclassering en Jeugbescherming Aruba hunto cu Cuerpo Policial di Aruba a anuncia nan campaña nobo, HALT Aruba. Seraida Pemberton-Leonard, directora Stichting Reclassering en Jeugbescherming Aruba hunto cu Robert Candelaria, Hoofd Recherche Diensten & Waarnemend Korpschef KPA y Esther Schwengle, Fiscal di cartera hubenil na Ministerio Publico (OM) a elabora tocante e trayecto HALT.

Pemberton-Leonard a splica cu HALT ta un trayecto cu a cuminsa desde aña pasa october den cual nan ta ofrece e hobennan, na momento cu nan comete un delito leve, e oportunidad pa bin na remarke pa participa den e trayecto HALT.

El a indica cu Stichting Reclassering a inicia e trayecto HALT pa motibo cu den añanan recien nan a ripara cu hobennan cu yega reclassering a comete delitonan mas pisa y hopi di nan ya caba tabatin contacto cu husticia pa delitonan leve.

Pemberton-Leonard a sigui splica cu HALT ta un proyecto cu ya ta andando na Hulanda. Stichting Reclassering a tuma esaki over y a adaptele pa den e contexto y cultura di Aruba introduci esaki.

E ta un trayecto di 20 ora den cual e hoben un biaha pa siman lo participa durante un periodo di cuater luna hayando diferente tarea pa e por reflexiona riba su comportacion cu e tin cu cambia y tambe tin posibilidad pa restitui of compensa e delito cu e la comete.

Sr. Candelaria di Cuerpo

Policial di Aruba di su banda a splica cu HALT ta e alternativa pa e hoben y alabes ta e liña cora den e maneho di con ta deal cu hobennan cu ta kibra ley. El a enfatisa cu e idea nunca ta pa detene y castiga un hoben na prome luga, mas bien e idea ta pa coregi loke ta robes y mas tanto cu por zorg pa rehabilitacion, pa e hoben no haya un strafkaart y pa e haya guia pa sigui hiba un bida bon desaroya pa e bira un ciudadano cu ta contribui na su pais.

El a resalta cu e ta algo cu e hoben hunto cu su mayornan of voogd mester tuma un decision riba dje, un aspecto hopi importante pasobra HALT ta un trayecto voluntario. Esey ta nifica cu si e famia scoge esey, e ta participa den e trayecto, ta ser supervisado y e no ta haya un strafkaart, pero si e nenga di scoge e trayecto tin e ruta tradicional di e cadena hudicial.

Candelaria a indica cu hunto cu Stichting Reclassering y Ministerio Publico ta traha un lista cu ta consisti di cuater delito leve cu un hoben por comete y ta bin na remarke pa scoge e trayecto HALT. E lista di e delitonan leve aki ta inclui, entre otro, bringamento den luganan publico of hortamento, sin niun tipo di arma.

“Nos ta mira pa dilanti cu esaki ta bira un instrumento mas den un arsenal di con bo ta yuda deal cu e problematica di hobennan cu ta cay den man di husticia cu e proposito principal no ta cera y castiga, pero e proposito ta evita, y ora cu e pasa toch con bo ta coregi pa evita cu esaki ta bira algo cu ta afecta e bida di e hoben aki for di un edad asina hoben,” el a remarca.

Di su banda Esther Schwengle Fiscal a agrega cu HALT ta pa evita cu menornan cu a comete un delito ta drenta sistema hudicial. Si nan acepta esaki y cumpli cune, nan no ta drenta e sistema di Ministerio Publico, cual ta e intencion.

El a indica cu aunke a cuminsa cu e trayecto aña pasa caba, e publico no tabata sa di dje. Poco poco e comunidad a cuminsa haya sa, asina a bin dilanti hopi pregunta y p'esey a lansa e campaña aki.

Contestando pregunta di prensa, Pemberton-Leonard



a splica desde aña pasa 49 hoben a participa na e trayecto HALT di cual 34 ta mucha hombre y 14 ta mucha muhe, un total di 41 hoben ta naci na Aruba y edad promedio cu a participa na e trayecto aki ta 15-16 aña, cu e edad mas hoben ta 12 aña. E delitonan cu a bin mas dilanti durante e trayecto ta maltrato y bringamento den luganan publico.

Di e hobennan cu a participa 22% a termina positivo y 32% negativo, pero el a remarca cu e cifra negativo ta bin dilanti mas tanto debi na cu e mayornan no a participa of no a coopera mucho cu HALT.

El a enfatisa cu pa e motibo ey tambe nan ta lansando e

campaña pa duna mas conocimiento na esaki pa asina cu na momento cu e hoben haya su mes den un situacion penal pa un delito leve y ora JZP ofrece e oportunidad pa participa den e trayecto HALT, nan por tumele sabiendo cu e trayecto ta pa e hoben keda afo di e sistema hudicial y pa e no bolbe cay cera.

Contestando pregunta di prensa tocante conscientizacion, Pemberton-Leonard a splica cu reclassering ta drenta den e situacion na momento cu un hoben of adulto comete un delito. Nan ta traha un rapport pa Ministerio Publico of pa corte, ta duna guia y tambe ta ehecuto trabou pa comunidad.

Pero pa preveni esey nan ta duna tambe diferente charla na scol, na diferente organizacion, na tur cu acerca e stichting pa duna charla. Nan no papia unicamente di e trabou, pero tambe ora ta trata hobennan nan ta papia tocante kico por causa hobennan pa desvia.

Por ultimo Stichting Reclassering a enfatisa cu ta hopi importante pa e mayornan ta involvi pasobra un di e pilarnan di e trayecto HALT ta e envolvimento di e mayornan. E ta bay asina leu cu na momento cu un screening ser haci, si ta necesario lo bin tarcanan specifico cu ta dedica pa traha riba e relacion di e hoben y e mayor.